



Kamis, 29 Juni 2023

Ogen : Rut 3:1-4




Ndarami Perbulangen Man Permain



Jarang lit hubungan simetua ras permainan i bas jaman gundari enda bagi harmonisna hubungan Naomi ras Rut. Duana ia nggo mbalu. Duana mulih ku Betlehem guna ndarami dahin. Sepengodak-sepengole ia duana, antara simetua ras permainan. Si luar biasana ka, maka Naomi simetua Rut, ersura-sura ndarami perbulangen man permainanna alu tujun kai? Gelah meriah iakap permainku e, nina Naomi. Emaka isuruh Naomi permainanna Rut guna reh ndahi Boas. Sebab Boas nari nge ngenca kade-kade Naomi arah perbulangen Elimelek. Ituriken ras iajari Naomi kai si arus ilakoken Rut guna ndeheri Boas. Janah ilakoken Rut bagi kai si ikataken bibina e.

Kai maka banci bage hubungan antara simetua ras permainan? Adi si nehen turi-turin Rut enda, maka lit sada komitmen si ibelasken ras si idalanken Rut nandangi bibina. Rut erkomitmen guna tetap ras bibina (1:16-17), janah enda jadi sada keterikatenna ras bibina ibas ndalani kegeluhen enda.

Saja ngenca tentu selaku simetuana, Naomi pe ertanggung jabab nandangi kecibal kegeluhen Rut. Uga adi ia reh tuana ras mate, ise nari nge kari si jadi teman Rut enda? Tentu hal sie me jadi perukureнна, maka idaramina perbulangen man Rut, emaka Boas me si ate Naomi jadi perbulangen Rut. Janah teridah maka Boas kedungen jadi perbulangen Rut.

Hubungen antara simetua ras permainan ula min jadi hubungan orang dalam ras orang luar. Megati kal sekalak permainan ikataken orang luar erkiteken ia reh ku jabu simetuana. Searusna adi sekalak permainan nggo bengket ku jabu perbulangenna maka ia ialo-alo desken sekalak anak diberu ibas jabu eme keleng ate nande nandangi anakna. Alu bage lanai lit istilah mertua VS menantu tapi si lit mertua  menantu.